

BERITA HARIAN

DATE: 29/8/2008

Bajet 2009 tidak akan kecewakan rakyat: PM

Pak Lah janji umum berita gembira untuk semua hari ini

Oleh Wan Hazmir Bakar
bhnews@bharian.com.my

PUTRAJAYA: Perdana Menteri, Datuk Seri Abdullah Ahmad Badawi, berkata Bajet 2009 yang akan dibentangkan beliau di Dewan Rakyat petang ini tidak akan mengecewakan rakyat.

Malah, Abdullah yang kelihatan yakin dan ceria turut meminta rakyat mendengar ucapan pembentangan beliau dengan teliti.

"Tunggu hari ini, dengar setiap perkataan yang saya ucapkan, anda tidak akan kecewa," katanya kepada pemberita ketika meninjau persiapan terakhir penyediaan laporan Bajet 2009 oleh kakitangan Kementerian Kewangan di sini, malam tadi.

Terdahulu, Abdullah yang tiba pada jam 9.10 malam bersama isteri beliau, Datin Seri Jeanne Abdullah, disambut Menteri Kewangan II, Tan Sri Nor Mohamed Yacop; Timbalan Menteri Kewangan, Datuk Ahmad Husni Hanadzlah dan Datuk Kong Cho Ha, serta Ketua Setiausaha Perbendaharaan, Tan Sri Dr Wan Abdul Aziz Wan Abdullah.

Abdullah yang juga Men-

“*Tunggu hari ini, dengar setiap perkataan yang saya ucapkan, anda tidak akan kecewa*”

Abdullah Ahmad Badawi
Perdana Menteri

teri Kewangan meluangkan masa kira-kira dua jam beramah mesra dengan kakitangan Perbendaharaan yang terbabit dalam penyediaan Bajet 2009 sejak beberapa bulan lalu dan memeriksa dokumen berkaitan.

Pembentangan Bajet 2009 dijadual di Dewan Rakyat pada jam 4 petang ini.

Pemerhati ekonomi berpendapat kerajaan berdepan cabaran hebat untuk merangka Bajet 2009 yang disenangi rakyat dalam situasi politik semasa dan ekonomi dunia yang tidak menentu akibat kenaikan harga minyak global dan makanan.

Namun, baru-baru ini Timbalan Perdana Menteri, Datuk Seri Najib Razak, membayangkan kerajaan akan mengumumkan berita gem-

bara dalam bentuk 'buah tangan' untuk dinikmati rakyat menerusi Bajet 2009.

Beliau berkata, kerajaan memahami kesusahan rakyat berikutan penstrukturan semula subsidi minyak dan tekanan inflasi.

Adalah dijangkakan fokus Bajet 2009 tertumpu kepada usaha kerajaan membantu golongan bawahan serta pertengahan untuk berdepan suasana sukar.

Kerajaan juga dijangka mengumumkan pelbagai insentif percukaian selain menyalurkan bantuan kepada golongan berpendapatan rendah, usaha meningkatkan sistem pengangkutan awam, pendidikan, insentif kepada kakitangan awam dan pembangunan modal insan dalam industri perniagaan.